

國史考異

國史考異卷之五

吳江

潘程章力田撰

吳炎赤溟訂

文皇帝上

一

實錄洪武三十五年七月辛丑。上視朝罷。以建文多改舊制。顧侍臣歎息曰。只如羣臣散官一事。前代沿襲行之已久。何關利害。亦欲改易。且陵土未乾。何忍紛紛爲此。于是天顏愴然變色。乃進吏部尚書張統。戶部尚書王鈞諭曰。卿二人久事皇考。習知典故。今皆老矣。

其解見職務。月給尚書半俸。居京師。視時政有戾舊制者。竝向朕直言之。勿隱。庶稱屬望老成之意。按王鈞以越三日甲辰奉命往山東等布政司。巡視民瘼。而張統不見所終。遜國臣記云。靖難後。召統及戶部尚書王鈞諭云云。統出。遂自經。吏部後堂死。皇明通紀云。成祖討姦黨。張統與焉。以茹瑺李景隆言得宥。復爲吏部尚書。一日上臨朝。詰問建文中變亂官制。顧侍臣太息。統懼而自縊。與實錄及遜國臣記相合。余考統之死。說者不一。或曰。靖難師迫。高皇帝思不食而卒。或曰。聞文皇帝卽位。自堂上投地。痛哭徹夜。淚盡繼之以

血迨曉竟自縊。或曰。投鍾山龍潭。妻與二妾四子家僮皆從。今按解職之命在。文皇帝卽位後。已踰月矣。而謂統已前死者。溢美之譚也。統之自經。雖不著于實錄。而其事略可互證。實錄稱。成祖語及散官事。歎息變色。因極道輕佻諂諛之徒。導人君改祖法之害。娓娓百餘言。乃進統等諭之。不斥其前此紛更之失。而曰。視時政有戾舊制者。竝向朕直言之。詞婉而意嚴。此統所以慙懼而死歟。然王鈍復用而統不免者。非獨人品不同。亦以官制之改。職在冢宰。統固有不得辭其責者矣。皇明記略云。靖難兵渡江。吏部尙書張統自經于部之後。

堂一妻二妾二子六奴隸相繼投池中死此革除錄載而未備者據此則統本縊于後堂而投水死者乃其家屬傳聞失真遂有竝投龍潭之說耳統之一死足以謝方鐵諸公而王世貞以爲宜入循吏傳誠有見也

二

實錄洪武三十五年七月甲辰命前工部尚書嚴震直戶部致仕尚書王鈞應天府尹薛正言等分往山東山西河南陝西等布政司巡視民瘼何弊當革何利當建速具奏來九月壬辰工部尚書嚴震直卒遜國臣記則謂靖難兵起震直督餉齊魯間兵敗爲北兵所縛置布

囊兩馬夾舁至北平。建文君遜位後。復爲工部尚書。奉使安南。回至雲南。見建文君。悲愴吞金而死。考實錄本傳。震直以洪武丁丑。坐事降御史。未幾。復爲工部尚書。不言曾以督餉被囚北平。而雲南吞金之說。尤爲傳會。按洪武實錄。二十八年八月戊辰。遣禮部尚書任亨泰。監察御史嚴震直。使安南。諭以討龍州趙宗壽之故。則奉使安南。乃洪武末年事耳。若文皇卽位。詔諭安南諸國。則在是年九月丁亥。與震直邈不相及。吳江謝常輓震直詩有云。海隔華夷勞遠使。天生才傑佐高皇。亦可見遠使在。高皇時。非文皇也。王鈍跋高

太常前工部尚書嚴公歷官記云。蒙太祖高皇之寵  
渥。重其秩于左右。而不暇輟于藩閭。皇上繼登寶位  
之初。公以老辭。不預乎事。皇上復以公任事之久。眷  
顧而畱居京師。筵朔望之駕班。皇上謂讓皇也。雷  
禮列卿記。謂震直建文中致事。文皇卽位。復召爲工  
部尚書。巡視山西。以疾卒于澤州公館。其言歷歷有徵。  
以實錄王鈍本傳考之。則鈍使北京山東。而震直使山  
西。其卒于澤州。而不于雲南。明矣。實錄本傳。詆震直姿  
貌魁偉。而寡學無識。善附權要。上頗薄之。然史臣每  
目齊黃諸臣爲權要。則上之薄震直者。其故有在。而

震直大節。得此益彰。何必飾言吞金而死。以誣後世哉。雷禮嘗與鄭氏同事。吾學編之成。禮又爲序。此等大事。漫無質正。何也。

三

實錄。洪武三十五年九月甲申。封都督僉事丘福爲奉天靖難推誠宣力武臣。特進榮祿大夫。右柱國中軍都督府左都督。淇國公。食祿二千五百石。子孫世世承襲。按福于靖難功臣中。位第一。而其攻戰之績無聞焉。實錄本傳。但云。福質直無文。有勇力。每戰必先士卒。所至克捷而已。鄭氏異姓諸侯傳。謂靖難兵初起。與朱張二



王首建議奪九門。轉戰真定夾河滄州靈壁。先登有功。是以福之功。亞于朱張二王也。然福之善戰。雖不及張玉。而視朱能則稍過焉。以奉天靖難事蹟考之。元年八月壬戌。真定之戰。耿炳文敗。奔入城。闔門自守。丘福等殺入子城。門閉乃退。二年四月。白溝河之戰。令都指揮丘福等。以萬餘騎衝其中堅。不動。上以精銳數千。突入敵軍左掖。殺傷甚衆。敵勢披靡。莫敢嬰鋒。乃麾張玉。朱能。丘福等。馬步齊進。人自爲戰。勇氣百倍。四年五月辛卯。淮北之戰。上別遣丘福。朱能等。將驍勇數百人。西行二十里。以小舟潛濟。漸近敵營。舉砲。敵驚愕。福等

突衝敵陣。敵衆棄戈甲而走。我師盡獲其戰艦。遂濟淮。駐南岸。自二年四月以前。福以都指揮敘名于張玉。朱能之次。及四年五月。則福反在朱能上。其時張玉已死。而六月癸酉。陞都指揮使丘福。朱能等。俱爲都督僉事。則福已褒然居首矣。可見福之戰功。顯于白溝河。而淮上先登。亦其次也。福旣坐與高煦善。不爲清議所與。又以臚胸河之敗。身死家破。故國史盡沒其功。而鄭氏亦不能詳。噫。惜哉。

四

實錄。洪武三十五年九月己丑。敕遼王植曰。賢弟以遼

地荒遠。經涉海洋。餽運爲難。固請改國荊州。今勉從所請。建國荊州。而仍舊封。丙申。修荊州前護衛爲遼王府。鄭氏大政記。謂建文元年八月。徙封遼王于荊州。誤矣。王氏家乘攷云。程敏政作其宗人長史通傳。謂高皇帝上賓。從遼王渡海南還。辛巳。進左長史。明年。從之國荊州。公悉心輔導。王敬禮之。府中有衛士紀綱者。用謂事得幸。公每名而笞責之。會文皇帝舉兵靖難。遣人至荊州。公草封事上之。凡數千言。文皇帝既正大統。紀綱者亦以入賀。畱侍。歷官錦衣衛指揮。被顧問。因乘間及封事。遂有詔械公詣京師。殺之。簿錄其家。按遼王

渡海至京推戴後以壬午九月請徙國荊州從之是時  
文皇卽位久矣乃謂文皇帝舉兵靖難遣人至荊  
州公草封事上之不亦誤乎又紀綱者山東臨邑書生  
也謂爲遼府護衛公每名而笞責之不又誤乎然則通  
之有忤于燕或佐遼時有之而不于荊州也余攷紀綱  
本傳謂綱濟南臨邑人由郡庠生從上平內難累官  
錦衣衛指揮使野記載濟南諸生高賢寧目綱爲學校  
廢材蓋黜生也則程氏遼府衛士之說何自而來又考  
實錄洪武三十一年十二月丁巳陞羽林前衛千戶紀  
綱吳仲安爲指揮僉事俱府軍衛不知卽此紀綱否果

爲一人。則洪武末已投筆從軍。安得靖難之初尚在遼府也。建文元年八月。召遼寧二王。遼王浮海至。寧王不至。吾意遼王之舉國南還也。安知通不有力焉。而有左史之擢。等以是故得禍乎。所草封事疑不虛。然非紀綱所文致也。敏政旣謂通從遼王渡海南還。辛巳進左長史。明年從之國荊州。則亦知荊州之徙。在壬午卽位後矣。而又有文皇舉兵遣人至荊州之說。自相牴牾。蓋出于流傳之譌也。通傳又云。黃希范洪武末先出知徽州府。雅與公善。至是亦爲衛卒所捕。并籍其家。同赴京師。而績溪程姓最衆。幸使者仁恕。罪止一房。餘獲免焉。

遜國臣記因之。遂以通與希范竝列死事。然博覈如敏政。而所述先世事。猶不免參差如此。書又安可盡信也。

五

實錄洪武三十五年九月乙巳。命都督陳用孫岳陳賢移山西行都司所屬諸衛官軍于北平之地。設衛屯種。永樂元年四月丙子。中軍階督僉事孫岳免。岳建文中領兵在鳳陽。嘗毀太祖皇帝所建寺。取材修戰艦。至是爲刑部尚書鄭賜所劾。免官。安置海南。遜國臣記云。孫岳洪武中。立功。官至都督同知。建文中。克鳳陽。守將靖難兵起。大修守戰器械。撤寺材爲戰艦。樓櫓戈甲有

法列寨淮西。水陸有備。北兵竟從下流渡淮。至盱眙。金川門不守。尚猶堅守中都。永樂元年。法司劾岳逮至京。宥死。安置海南。鄭氏所記大槩與國史合。但云金川門不守。猶堅守中都。則似增飾之詞。蓋岳奉移軍北平之命。越半年而後謫海南。非自中都逮至京也。此與梅殷散師還京之事正相類。若果據城抗命。則法司之劾。當不待元年四月。而其罪有大于毀寺取材者。又豈得宥死安置也哉。壬午之役。武臣殉義寥寥。如孫岳者。亦可無譏。但當據事直書。則美惡自見矣。

實錄。洪武三十五年十月壬子。寧王權來朝。丙辰。宴寧王。權谷王穗于華蓋殿。辛酉。改江西布政司治爲寧王府。永樂元年二月己未。以大寧兵戈之後。民物凋耗。改寧王府于南昌。是日遣王之國。賜鈔一萬錠。親制詩送之。按十月辛酉。己書改寧王府。二月己未。又追述之。書法不無贅複。先是寧王奏請封國。欲得杭州。上報書以爲天子畿內不以封。祖訓不可違。建寧荊州重慶東昌皆善地。可自擇之。初不及南昌也。豈南昌之徒實出王意。因入朝自請之。而成祖遂舉以授之耶。且成祖前書。固云。往者嘗許弟自擇封國矣。如遼王之荊州。



亦其自請而非朝命。寧王援例以求。或亦勢所不能靳也。然洪熙實錄永樂二十二年九月。寧王又言。寄居江西。非所封之國。不與封鎮各王例同。仁宗答之。亦第曰。江西之地。叔受之。先帝已二十餘年。爲國南屏。非封鎮而何。如此而已。豈寧王先自擇之而後復悔之耶。鄭曉同姓諸王傳云。王初欲得蘇州。上曰。蘇州畿內。不許。又欲得杭州。上云云。王遂出飛旗。令有司治馳道。上大怒。王不自安。屏從兵。從五六老中官。走南昌。病臥城樓。乞封南昌。上不得已。卽藩司爲府。改封王。此說最爲疎野不經。寧王初無欲得蘇州事。所謂畿

內不以封者。蓋太祖始封于吳。而杭州亦吳地也。王以壬午十月來朝。僅數日而江西之命下。又五月而後之國。安得有飛旗治道及稱病臥城樓之說耶。但王恃帷幄功。以舊封荒瘠。要求內徙。則誠有之。史官不深究其本末。見永樂元年三月有大寧內徙之役。在寧王改封之後。遂謂以兵戈之後。民物凋耗。故改耳。不知南昌之封。非成祖意也。勢也。

七

實錄。洪武三十五年十月丁巳。吏部奏。前北平所屬州縣官朱寧等二百一十九人。皇上舉兵靖難之際。俱

棄職遠避。宜寘諸法。命人粟贖罪畢。發興州屯戍。按當時國法甚嚴。自誅死之外。復有謫戍興州一科。而其姓氏多佚不傳。遜國臣記云。周縉武昌人。以太學生授永清典史。靖難兵起。永清地近燕。民相率逃散。縉度不可爲。懷印南奔。壬午十月丁巳。吏部言云云。有司遂械縉至京師。謫興州。居數年。子代還。年八十。終于家。吳文定公嘗爲縉傳。以故獨傳。寧等竟不可考。陳敬宗撰黃淮墓誌云。靖難師後。吏部例以南人官北土不效順者。奏編行伍。公曰。近有勅旨。征討官與舊官事同一體。若復追罪南人。與勅旨相背。上卽罷之。蓋此二百一十九

人者。皆以南人官北土。不早歸順而得罪。其後多得生還。則黃淮一言之力也。周緡懷印南奔。於義無失。而傳盛讚其極力拒守。與糾義旅勤王。則似後人緣飾之辭。未足盡信。又敖英雜言云。靖難師駐金川門。是夕。給舍御史郎四十餘人。相與縋城遁去。詰朝。邏者覺察以聞。文皇悉寘不問。已而軍衛繫之。累累相繼以獻。畏死者輒歸附。悉復其官。今兵部鄉縛冊。可槩見也。然烏舉雲匿。亦已多矣。立齋閑錄載永樂二年十一月十九日。教坊司官于右順門口奏。蒙錦衣衛鎮撫司。發下在逃官牛景先的次妻。合無照例刺字。奉欽依。還照舊例凌

遲十二月二十二日。敎坊司于奉天門題奏。有奸惡婦  
卓敬女楊奴。牛景先次妻劉氏。合無照依前例。奉欽依  
是。此敎坊冊所記。景先不知何官。而前云在逃。後云奸  
惡。則必名挂黨籍。而脫身遠遁者。故其家屬皆罹酷刑  
耳。遜國臣記則謂景先禦靖難兵。數有功。金川門失守。  
變姓名。易服出走。死蕭寺中。夫景先爵里且不可攷。而  
以爲數有戰功。卒死蕭寺。又孰從而睹記之也。萬曆三  
十三年。葉文忠公向高。署南京禮部事。有牛濱者。自言  
景先之裔。景先官御史。金川門失守。宵遁至丹陽。遇一  
僧云。徐行吉。速行凶。遂改姓名徐行。死于杭州寺中。次

妻劉氏沒入教坊。劉氏遺子名能。五傳至濱。皆不肖失身。葉公信之。爲除其樂籍。事見朱國禎史概。大都影響遜國臣記而曲爲之辭。弘光中。禮部又引致身錄以景先爲所鎮撫。而祀之從亡之列。噫。立乎定哀以指隱桓。隱桓之事遠矣。以景先輩爲夏五郭公可也。

八

實錄。洪武三十五年十月辛酉。都督陳質有罪。伏誅。初質任江西都指揮。建文中。調守大同。遂陞中軍都督同知。擅作威福。劫制代王。僭取府中器物。鹵掠已附居民。强奪良家子女。至是事覺。誅之。遜國臣記云。陳質。建文

初克叅將守大同。尋陞中府都督同知。發代府陰事。代簡王獲罪。靖難兵出懷來。質以西師助宋忠。忠敗。退守大同。靖難後。被執。不屈。上曰。質姦人。害代王者。遂被殺。余謂燕師之起。西北諸藩。無不歸心。如寧王則舉國以從矣。谷王則漏師先遁矣。代簡王妃。與仁孝皇后兄弟也。於燕至親。而王年少好武。所居又天下勁兵處。成祖之欲倚以爲助久矣。其出居庸。攻大同。雖曰誘李景隆而罷之。然安知非謀挾簡王。合燕雲之衆。左提右挈。如大寧已事乎。質之刼制王也。先事伐謀。實爲成祖所濫忌。特以質手握重兵。故遲回數月。而受殺也。

罪誅之耳。成祖大同之役。蔚州廣昌相繼迎附。旋復失之。是時德州真定諸軍。遠不相及。蓋亦質等之功。所云鹵掠已附居民。卽其事也。簡王在國多過失。自永樂以後。屢賜勅戒諭。則其奪爵于建文時。罪皆自取。無可言者。然當時周齊岷湘諸王。得禍甚酷。而簡王止收寶冊。見幽國中。則陳質之刼制。未必非所以曲全之。此與吳楚反時。淮南相城守。不聽王而爲漢之事。何以異。然則如質者。不特建文之忠臣。抑亦簡王之功臣歟。

九

實錄

洪武三十五年十一月甲辰。都察院左副都御史



陳瑛言。車駕初至京師。有不順命而效死于建文者。如禮部侍中黃觀。太嘗寺少卿廖昇。翰林院修撰王叔英。衡府紀善周是修。浙江按察使王良。沛縣知縣顏伯偉等。計其存心。與叛逆同。宜追戮之。上曰。朕初舉義。誅姦臣。不過齊黃數輩耳。後來二十九人中。如張統。王鈍。鄭賜。黃福。尹昌隆。皆宥而用之。今汝所言數人。況有不與二十九人之數者。彼食其祿。自盡其心。悉勿問。蓋上初入京城。昇及是修。自經死。觀時守安慶。投江死。叔英守廣德。自經死。良在官。闔家自焚死。先是。上兵至沛縣。伯偉不肯下。與其子俱死。後瑛閱方孝孺等獄。詞。

遂簿錄觀叔英家妻女。皆將給配。觀妻出通濟門。先擠其二女于河。遂自沈。叔英二女皆笄。就錦衣衛獄。俱赴井死。按效死諸臣。見於史者。惟此數人。首尾完備。則陳瑛一疏。未必無表章之力矣。然觀疏中所指。似不止此數人。及考東里文集。則周是修。嘗與西楊約同死事者也。王叔英。嘗薦西楊。後題其墓者也。顏伯偉。則產於廬陵。西楊嘗爲詩哀之者也。乃知數人事跡之得見於史。皆西楊之志也。若其餘磨滅而不傳者。何可勝言。又豈獨叩頭乞哀一語。爲西楊曲筆乎哉。二十九人姓名。史不具錄。以皇明通紀所載姦臣榜考之。自子澄。泰。孝孺。

觀叔英及迎附五人而外。則有陳迪。練子寧。胡閏。鄒瑾。郭任。盧迴。侯泰。暴昭。毛泰亨。陳繼之。董鏞。曾鳳韶。王度。高翔。魏公冕。謝昇。宋徵。卓敬。巨敬。其數相符。然此榜止及文職。而不及武臣。不知何據。其後增爲五十九人。則諸書所載。互有出入。愈莫可致詰矣。若立齋閑錄所記景清。位甚顯。死甚烈。而史不著。姦臣榜亦遺之。此皆尚論者所深惜也。

十

實錄。永樂元年正月甲子。武定侯郭英卒。本傳言英從太祖渡江。取金陵。以謹重見信任。恒宿衛帳中。鄭氏

異姓諸侯傳云郭英癸巳年十八從上起義兵宿帳中從取滁和又云郭興壬辰隸滁陽王麾下時上在元帥甥館專征伐興備宿衛從克滁和興英之兄也劉三吾撰郭興神道碑云自癸巳歲起兵首隸元帥郭某麾下卽知所適主明年得滁州又明年得和州亦旣從龍濟江蓋郭興兄弟皆以癸巳歲杖劒入濠而歸心太祖者也黃金開國功臣錄則謂郭興父山甫高皇帝微時過之山甫驚異畱飲酒酣備陳天表之貴因以子女入侍此蓋小說家彷彿呂公相高祖事而爲此言不知太祖托身于皇覺寺之前郭氏子女何從入侍

若以癸巳起兵之後言之。上方在滁陽甥館。亦不聞其有副室也。黃金之妄。足資咀噉。又異姓諸侯傳云。與有弟德成。事上爲驍騎舍人。召授某府都督。懇辭不受。攷楊榮撰郭英神道碑。稱兄弟四人。長早卒。次興。封鞏昌侯。次某。福建都指揮使。意卽德成也。其官非舍人。亦無辭都督事。然則鄭氏所記德成削髮披緇。痛飲避禍。又豈盡有依據耶。今皆不取。

十一

實錄。永樂元年二月庚戌。設北京畱守行後軍都督府。北京行部。革北平布政司按察司及北平都司等衙門。

大明會典云。永樂初。陞北平爲北京。總置行部。後旣遷都。又分置六部。各稱行在某部。十八年。定都於北。除行在二字。其舊在南京者。加南京二字。洪熙元年。復稱行在。宣德三年。行部革。正統六年。復除行在二字。遂爲定制。鄭氏百官述亦云。旣遷都。罷北京行部及六曹清吏司。分置行在六部。是誤以行部之後。分爲行在六部。似是而實非也。蓋北京肇建。革布政按察二司而設行部。所以重其事權。然行部之與六部。階級雖埒。職掌則殊。觀永樂四年正月。書北京行部并天下文武官述職。七年正月。書北京行部及天下布政司府州縣官來朝。賜

勅戒諭皆與三司同列。而宣德三年三月勅云。爾北京行部實總畿內之郡邑。以宣政化。以共國用。則其異於六部斷可知矣。且也遷都之後。初置六部。於時行部實未嘗革。而其革也。乃在十八年定都北京。除行在字之後。會典諸書皆誤也。以國史覈之。永樂十八年九月丁亥。命行在禮部。自明年正月初一日始。正北京爲京師。不稱行在。各衙門印有行在字者。悉送印綬監。預遣人取南京各衙門印。給京師各衙門用。十一月壬午。革北京行部。并所屬吏戶禮兵刑工六曹清吏司。洪熙元年三月。命諸司在北京者。悉加行在二字。復建北京行部。

及行後軍都督府。然則六部之去行在也。行部與俱罷。其復加行在也。行部亦再建。兩者不相沿襲。事理甚明。宣德實錄。書三年八月辛卯。革北京行後軍都督府及行部。永樂初。建北京。置行後軍都督府行部。及遷都北京。置五府六部。皆如南京。行都督府行部猶存。凡五府六部文移。令行北京直隸府縣者。及直隸衛所府縣申達五府六部者。必經行都督府行部。文移重複。事或稽誤。上命公侯伯尚書。郎御史學士議。于是英國公張輔等言。北京既有五府六部大小衙門。其行府行部宜革。上從之。此則行部之與行在六部。名實相混。在當



時業已病之矣。王世貞謂行部卽布按二總司斯言最當。而李友直本傳謂旣建北京。改北平布政司爲行部。蓋併二司之事爲一者也。考官制者其詳之。

## 十二

實錄。永樂元年九月戊戌。以刑科給事中黃鉞爲戶科左給事中。姑蘇志云。黃鉞字叔揚。常熟人。洪武初。以太學生授典史。後登進士第。遷戶科左給事中。以憂家居。壬午歲。自投琴川橋下死。革除遺事亦同。然以史攷之。則永樂元年鉞尚在不死也。豈當時官戶科者有兩黃鉞耶。遜國臣傳則謂鉞與姚善同盟勤王。善死。鉞亦投

琴川橋下。蓋本副使楊儀所爲傳。儀自記云。從餘慶書院僧本清疏簿中。得所記黃黃門事實。則其僞託之跡顯然。而鄭氏不察而書之。何也。然則鉞之死。當以何書爲據。余讀陸鉞病逸漫記云。黃鉞常熟人。與胡濙尚書同榜進士。以給事中養病家居。永樂初元。徵赴京師。至半途。投水自溺。其言與實錄合。然後知鉞初以家居。不與壬午之難。明年服闋。徵詣京師。乃從容自投琴川。而以半途溺死聞。此全宗免禍之道也。設令曾叅姚善軍事。安得不爲邏者所跡。而優游以終邪。姑蘇志以先授刑科爲戶科。漫記以遭喪家居爲養病。則傳聞小異耳。

錢氏初學集云。吾邑有黃給事鉞者。憂居聞變。自投琴川橋下。里人楊儀爲立傳。載給事與方希直執手商榷云云。又稱給事少受學於其五世祖澣。澣之子福。收其屍爲詩吊之。夢羽好著書。浮誕不實。又喜誇大其譜牒。識者哂之。同時鄧黻修邑志。削澣福不載。固已正其誣矣。而此傳已流傳人間。互相援據。後之君子。無好奇攬異。而道誤萬世之信史。則可也。噫。誠知給事之死。在踰年以後。則楊儀率合之謬。不攻自破矣。此錢氏之所未及。故究論之。

實錄。永樂元年八月丙寅。以羽林前衛致仕千戶王欽。首歷城侯盛庸不法事。得實。賞銀百兩。鈔四百錠。陞本衛指揮同知。九月乙未。削歷城侯盛庸爵。蓋都察院左都御史陳瑛等。劾奏其口出怨誹。心衷異圖。請寘重典。以警餘衆。言之再三。遂命削其爵。皇明通紀云。永樂元年九月。削歷城侯盛庸爵。下獄死。諸子皆被戮。鄭氏異姓諸侯傳云。永樂元年。都御史陳瑛。劾奏請誅庸。遂削爵。庸暴卒。以鄭氏暴卒之例推之。則庸當非令終者。而史臣隱之。但于是年閏月壬戌。書賜汝南王有勲書。及幣帛等物。蓋以庸爲有勲妃父。故以此慰悅其意也。則

庸之死於獄。在九月後明矣。

十四

實錄。永樂元年十月甲子。勅晉府長史龍鐔等曰。朝廷封建親藩。而選賢命材。爲之輔導。冀以贊成德善。不至於有過也。古之爲人臣者。無外交。今王府擅與西番往來。又私以車遞送。王年少寡學。而不知古。長史儒者。謂不知古可乎。廷臣皆欲寘汝於法。朕恐傷親親之意。姑宥不問。今後慎毋復爾。勉之戒之。按明年九月甲辰。擢刑部郎中艾少嶽爲晉府左長史。禮科給事中何仕讓爲右長史。勅諭有云。前長史龍鐔。旣不能以禮處已。又

不能以道事王。故縱羣下侵奪百姓。以累王之德。今已黜之。則鐔終不免於得罪也。革朝志云。龍鐔字德剛。萬載人。晉府左長史。靖難師起。徵兵於晉。鐔引大義。力主發兵。潛邸卽位。詔械鐔繫錦衣衛獄。不屈死。有收其遺骨。得其所自書贊云云。此必鐔之後人。欲薦擢其先祖之詞。而諸書不察。收入死事中。可笑也。鐔自以晉府交通西番事被黜。而云坐發兵舊嫌。不知嚮時晉府所有者。太原護衛兵耳。朝廷以虎符徵之。誰敢不發。長史何功亦何罪。豈可引以自文乎。雖然。當永樂初。晉王弟濟熿已萌奪嫡之計。日夜構成晉王罪惡。而首以西番一

事爲督過張本。觀二年九月。晉王欲上護衛及所畜小  
韃靼。成祖答書。有惟當修德行善。豈可因一二小人  
爲非。輒自懷疑之語。則王之危懼可見矣。鐔之繫獄。寧  
知非爲法受過乎。嗚呼。鐔何不幸而生罹實禍。又何幸  
而死盜虛名也。遜國事大率類此。

十五

實錄永樂二年六月乙未。命太子少師姚廣孝等往蘇  
湖賑濟。震澤記聞云。吳有王光菴先生賓者。高士也。與  
廣孝友舊。詣之。閉門不納。再往。復不納。三往。乃見之。曰。  
渠曷爲作此事。建文遺跡。因之。謂賓見廣孝。連呼曰。和。

尚誤矣。和尚誤矣。因責數其背恩不義諸事。累百餘言。此皆吳人不滿靖難時事。而歸過於榮國者之託詞也。列朝詩集云。賓字仲光。長洲人。同里好韓奕先生及姚榮國道衍。榮國定策後。徒步往訪。歎若平生。作賑災記。鋪陳其功德。沒而榮國爲立傳。兩公并分如此。世盛傳仲光詆毀榮國。方盥却走。終身不見。吳兒委巷妄語。流誤史家。不可以不正也。余謂榮國爲人。不無可議。而其佐命之功。自不可沒。世徒以其不能保全忠節。而責備之太過。至於仲光。往還酬贈。亦交道之常。豈必峻絕而後爲高乎。建文遺蹟。又謂廣孝賑濟蘇松等府。威聲赫



赫車徒甚盛。及南行。有醜詆者。廣孝若弗知。從官欲究之。廣孝遽止之曰。豈無同諱者邪。楊循吉蘇談至言少師。履獨步。爲縣丞所笞。竟不加罪。此皆劇言榮國之能忍辱。而不知賑濟之命。雖欲令爲德於鄉。亦將以蓋錦榮之。豈有橫受訶責。等於野僧者。此薦紳先生所不道也。

十六

實錄。永樂二年七月丙辰。勅李景隆曰。自古勲戚始終保全。必君臣兩得其道。爾朕姑之孫。少相親愛。共享富貴。實同此心。比者不煩以政。蓋欲遂爾優遊。爾不體此。

心內懷怏怏。交構不靖。潛謀日彰。朕念至親。略而不究。爾乃恃恩益恣。招誘無賴。藏匿逋逃。人發其奸。證驗顯著。尚僞言強辨。不知慙懼。論情據法。豈可寬貸。重念姑氏之親。但去勲號。絕朝請。其以曹國公爵歸第。以奉曹國長公主之祀。宜杜門省愆。易慮爲善。庶稱朕保全之意。八月癸未。禮部尚書李至剛。同六部都察院等劾奏。景隆潛畜姦謀。將爲不軌。廷臣累發其罪。皇上曲賜生全。而景隆略不戒懼。益肆僭踰。比者其家人被盜。巡捕官臨視其家。見景隆受闇者趨謁拜俯。如君臣禮。其勢漸不可長。乞正典刑。以收國柄。上曰。朕自有以處

之丙戌。至剛等劾奏。都督李增枝。明知兄景隆不臣之跡。曾無一言規諫。且於各處多立莊田。每莊畜佃僕。無慮千百戶。此其設意非小。望明正典刑。上曰。景隆兄弟。國之親屬。朕自處之。其莊田佃僕。俱沒入官。鄭氏大政記云。永樂二年十二月。禁錮李景隆。皇明通紀云。永樂二年十一月。曹國公李景隆有罪。下獄死。坐僭踰不法。及匿養亡命。謀爲不軌也。上初宥景隆死。惟沒其田莊。令杜門省愆。乃因奸人造妖讖。謂十八子當有天下。遂執下獄。幽閉其家人。谷王橐亦因而獲罪。景隆疑其姓。谷王爲高皇帝第十八子也。余按永樂七年六

月諭諸勲臣有云。李景隆柔奸稔惡。包藏凶慝。造爲妖  
讖。覲覲神器。天地鬼神。暴其逆謀。朕念其祖母至親。曲  
存寬宥。彼不知修省。懷忿積怨。久而益熾。若此。豈自保  
之道乎。所謂造爲妖讖。覲覲神器。與通紀之說相符。但  
云景隆下獄死。則不然。永樂十六年四月癸巳。勅周王  
橐曰。曩者李景隆謀逆。其家屬法皆當死。特寬宥之。發  
戍遼東。彼知景隆囚繫北京。潛逃滄州諸處。陰結黨與。  
欲行劫獄。爲人所告。俱已禽捕。置之於法。儀賓盛瑜。乃  
敢藏匿景隆家人。在於國典。瑜豈可容。以爾之壻。姑宥  
不問。觀此。則景隆十六年尚繫北京。而其家屬則多駢

死者矣。公侯伯襲封底簿云。李景隆因周王殿下奏奉  
太宗皇帝聖旨。住爵住俸。開門閑住。正統十三年。奉  
英宗皇帝聖旨。開門閑住。攷正統實錄。載宣德十年  
正月乙酉。命錦衣衛鎮撫司。見監罪囚。俱遵詔例。本司  
開具李景隆家屬一十四名。上命仍監禁之。正統十  
三年正月癸巳。勅南京守備豐城侯李賢等。已廢曹國  
公李景隆家屬增枝等。男婦大小三十八名。拘繫年久。  
人情不堪。茲特推恩。悉加寬釋。令於所居閑住。聽其出  
入生理。其男女聽與軍民結婚嫁娶。薪米之類。悉皆住  
給。蓋是時景隆增枝等。自北京歸故第。拘繫年久。始得

救出耳。鄭曉記云。景隆下獄四十五年而卒。自正統戊辰。上遡永樂二年爲四十五年。則景隆卒於赦出之後矣。景隆親爲文皇射鉤。斬祛之臣。而僭侈怨望。羣臣交劾。比之胡維庸藍玉。豈自意得全。首領于牖下。非列聖親親之恩。何以及此。而載筆者闕而不宣。亦可怪也。皇明記略云。李景隆初禦文皇。旣而降。爲文皇所薄。舉家置獄中。正統間。始釋其後。王氏岐陽王世家云。景隆繫私第。盡沒其莊田寶貨圖籍。戕獲入之官。而所繫者皆親屬矣。嘗絕其食。旬日不死。始稍稍給食。至永樂末。而景隆竟以凍餒卒。正統中。增枝猶在。以恩例

聽自便。是謂恩例止及增枝等而景隆不與。此不攷之過耳。

十七

實錄。永樂二年十一月己亥朔。都察院左都御史陳瑛等劾奏駙馬都尉梅殷畜養亡命及無賴之徒。出入其家者八十餘人。又私匿韃靼人與女秀才劉氏之女。造爲邪謀。乞正其罪。上曰。梅殷朕自處之。命錦衣衛執殷所匿韃靼人送遼東。三年十月乙丑。駙馬都尉梅殷卒。殷汝南侯思祖從子。頗驕侈。不慎行簡。上卽位。廷臣多言其過者。特優容之。殷與前軍都督僉事譚濬。錦

衣衛指揮趙曦有隙。一日四鼓入朝。經竹橋。溪曦令人  
粹殷墜橋下死。而曦誣奏殷自赴水死。上疑盜殺之。  
命下捕盜甚急。至是都督許成發其事。上震怒。命法  
司治溪曦罪。賜殷祭。謚榮定。遣官治喪葬。官其二子。順  
昌中軍都督同知。景福旗手衛指揮使。俱食祿不視事。  
壬申。譚溪趙曦伏誅。籍其家。丙子。封左軍都督同知許  
成爲永新伯。子孫世襲指揮使。旌其發溪等之姦也。按  
國史所書。殷之被殺。最爲詳明。而遜國臣記。則謂殷入  
朝。譚溪趙曦令人擠殷死。笄橋下。曦言殷自投河死。都  
督許成發其事。上怒。罪溪曦。對曰。此上命也。上



大怒立命力士持金爪落二人齒。斬之初公主牽衣大哭。問駙馬安在。上曰。爲公主踪跡賊。無自苦。余意陳瑛之劾殷。繼曹國長興二獄之後。則文皇固非無嫌於殷者。然以寧國之故。實無意赦之也。而濊賸以私怨逆援。上指擠之死地。觀成祖賜寧國書。言駙馬梅殷雖有過失。兄以至親不問。比聞溺死。兄甚疑之。今都督許成來首。乃小人所害。訊鞠果得其情。則成祖之心事亦既暴於天下矣。許成譚濊皆靖難功臣。實錄書洪武三十五年九月戊子。陞許成爲左軍都督僉事。譚濊爲前軍都督僉事。而成以同僚之雅。不難白發其奸。

此非賣浚等以塞口。可知也。且浚等事發下獄。閱七日而伏誅。何緣有觸怒立斬之說乎。遜國臣記稱殷嘗受高皇密命。輔建文君。及鎮淮安。擁兵不降。成祖迫公主以血書招至。既見。上有勞而無功之對。皆鋪揚過實。初疑其子孫自爲之。及閱梅純備忘錄云。先高祖駙馬都尉洪武末。出鎮淮安。靖難師至。猶固守其地。後臣民共推戴。文皇帝繼太統。先高祖知太夫人無恙。遂散師還京。同時有周是修者。亦自經。言者請追戮。上曰。彼食其祿。自盡其心。一無所問。嘗仰觀此言。則上於先臣固無所罪也。而姦諛者乃擅害之。痛哉。賴

聖明卒置於法。而臣家逮今受恩未艾。云純之自記。不過如此。則鄭氏果何據而大書特書乎。又攷之史。殷實有三子。中子永貞。爲孝陵衛指揮使。在殷未卒之先。永樂十四年十二月。命永貞子永善襲職。食祿不視事。則受恩者不獨二子也。而野記謂上紹統後。二甥猶幼。主保護甚至。恒與同寢。置於榻內。如是數年。比長乃已。其鄙妄尤不足辨。

十八

實錄。永樂三年正月壬子。先是上命翰林院學士兼右春坊大學士解縉等。於新進士中。選才質英敏者。俾

就文淵閣進其學。至是。稽等選修撰。曾棨編修。周述。周孟簡。庶吉士楊相。劉子欽。彭汝器。王英。王直。余鼎。章敞。王訓。柴廣敬。王道。熊直。陳敬宗。沈升。洪順。章朴。余學夔。羅汝敬。盧翰。湯流。李時勉。段民。倪維哲。袁天祿。吾紳。楊勉。二十八人入見。上諭勉之。時庶吉士周忱。自陳年少。願進學。上喜曰。有志之士也。命增忱爲二十九人。遂命司禮監月給筆墨紙。光祿給朝暮膳。禮部月給膏燭鈔。人三錠。工部擇近第宅居之。按二年三月。已命擇第二甲進士文學優等楊相等五十人。及善書者湯流等十人。俱爲翰林院庶吉士。俾仍進學。而周忱與焉。至

是請以進學翰林者學於文淵。且其年少。不愧英敏之目。故上嘉而許之耳。王氏科舉攷云。是歲人知選二十八人。不知初爲六十人。是也。野記則謂永樂三年進士放榜後。詔選二十八人入文淵閣緝學。以比二十八宿。號庶吉士。周文襄不與。乃自請於上。詔從之。時謂之揆宿。此稱遂遍於人間。凡未至其地而竊附者。以此稱之。鄭氏名臣記因之。亦云。周忱永樂二年進士。時簡進士二十八人進學文淵閣。公乞預。上喜公有志。改翰林庶吉士。是皆誤以二年之選六十人與三年之選二十八人混而爲一也。且庶吉士之名。不自永樂初。

昉也。國初選庶吉士分置府部。如觀政進士例耳。洪武  
實錄有刑科庶吉士楊靖。而劉三吾有送進士于子仁  
爲參軍府庶吉士序。不專隸翰林也。其專隸翰林則昉  
于永樂以後。而又拔其尤者與榜首三人同升文淵閣。  
廩給賜予有加。上時至館中。程其學業。此蓋造士殊  
恩。非常制矣。然而文襄請之。不爲越等。成祖許之。不  
爲破格。以詞林之去秘閣。一間耳。如野記所言。則是庶  
嘗一席。可以攀附而致。不幾令覲覲情要者借爲口實  
乎。吾不忍文襄之受誣簡冊。故爲訂之。

實錄。永樂四年二月辛巳。唐府長史程濟。韓府長史司典簿魏居敬。犯夜禁。兵馬司請送法司。特命宥之。於是吏部言。在京各王府官。坐食奉祿。閒暇無事。致多縱肆。宜改用之。上曰。王皆年少。方資輔導。其長史紀善。教授伴讀之官。不可闕。若審理奉祠工正等官。職事閒暇者。暫遣還鄉。待王之國召之。於是韓濟安伊魯唐岷七府。并靖江之輔國將軍。共畱長史紀善。教授等官四十員。餘審理等官一百三十四員。遣歸俟命。遜國臣傳云。程濟。朝邑人。爲翰林編修。金川門破。建文君亟召濟入問計。濟曰。天數已定。惟可出走免難耳。立召僧。爲

建文君落髮。濟從之出。每遇險。幾不能脫。濟以術脫去。相從數十年。後隨建文君至南京。人尚識濟。至京莫知所終。按此一程濟也。而編修與長史則稍異。弘光初。吏部議贈謚靖難諸臣。亦云不知當時有兩濟否。姑列附祀。蓋疑之也。然世言程濟爲人多怪。故多事者多託之。近有從亡日記一書。說云濟筆。自金川出奔。以至迎入大內。年月歷歷可徵。若以實錄攷之。則永樂四年。濟不出京師。卽日記所述偕雪和尚居重慶之歲也。或疑濟嘗寢食朝邑而治岳池學事不廢。如張芹所錄。則之燕之蜀。何所不可。果爾。則濟特王喬左慈之徒耳。而又



何以明犯夜禁也。況日記淺謬。不止一端。錢氏致身錄致。謂鄭端簡未見實錄。故楊行祥之獄。在正統五年。而遜國記言天順初。斯已謬矣。其所謂西內老佛者。國史已明著其僞。而況從亡之臣。隨至南京者。誰見之。而誰識之乎。又况所爲日記者。誰授之。而誰傳之。又將使誰正之乎。作致身錄者。涉獵革除野史。借從亡脫險之程濟。傳合時事。僞造彬與濟往還之跡。以欺天下。而又僞造濟此書。若將疏通證明之者。此其本懷也。二書不先不後。若期會而出。汲郡之古文。不聞發冢。江左之異書。誰秘帳中。日記出而致身錄之僞。愈不可掩矣。此論可

謂發奸趙伏。若其書之真贋。則有目者能辨之。故不復詳也。

二十

實錄。永樂五年七月辛巳。命中山武寧王徐達長孫欽。襲封魏國公。洪武中。王之嫡長子輝祖。襲封魏國公。

上初卽位。輝祖以罪免歸第卒。至是。上念王開國元

勲。不可無繼。特命欽襲封。祿米仍王之舊。歲給五千石。

欽。上所賜名云。徐欽本傳云。其父輝祖。襲封魏國公。

得罪廢死於家。遜國臣記。輝祖。中山王長子。文皇卽

位。勒罷。尋幽繫。永樂五年。輝祖卒。年四十。上曰。輝祖

與齊泰輩罪同。空論死。朕念中山王平定天下。有大功。

於國家。曲赦輝祖。今輝祖病死。中山王不可無後。令輝

祖子嗣魏國公。通給中山王沒後祿。

此見驗封司稿簿八月朔聖旨

輝祖長子釋迦保見。上賜名欽。嗣魏國公。遂乞守墓。

上怒。謫居中都。二十二年卒。皇明通紀云。壬午六月。

下魏國公徐輝祖於獄。時武臣無一人不歸附者。惟輝

祖不屈。上親召問。輝祖不出一語。始終無推戴意。法

司迫取供招。輝祖默然。操筆作書。其父開國功勞子孫

免死而已。上大怒。然以元勲國舅。欲誅又輒中止。排

徊久之。竟從寬典。止勒歸私第。革其祿米而已。按遜國

臣記止言勒罷幽繫與實錄本傳合而通紀則云先下獄後歸第輝祖乃心王室與齊黃同事而卒免於西市之誅者議親也議功也則下獄之說似不爲証蓋與曹國公例正同而國史大書中山武寧王長孫欽襲封魏國公其指有在矣又攷之史永樂九年三月壬午給事中曹潤等劾奏五軍都督府掌府事成國公朱勇魏國公徐欽定國公徐景昌等監試襲職武官縱家僮奪其弓槊法司奉旨追捕勇等蔽不與請正其罪命錦衣衛悉捕其僕付法司勇等姑宥其罪又曰徐欽未諳政務令歸務學長智識以奉宗祀庶免作過自累十九年正

月壬辰。欽自南京來朝。遽辭歸。上謂吏部臣曰。欽往者不知奉法。孤朕委任。故令讀書以廣聞見。今復不俟命。汲汲圖歸。此豈有立志。可罷爲民。俾歸鳳陽守先塋。用頓挫之。庶幾將來不墜其家。二十二年十月乙巳。復欽魏國公。欽至是復至。上念中山王開國元勳。復欽爵祿。俾奉宗祀。十一月。欽以疾卒。蓋欽嗣封之後。繼掌都府。坐累罷歸。又十年。以來朝遽辭。爲民鳳陽。文皇何嘗因其父而譴及其子邪。鄭氏乃謂其嗣魏國公。遂乞守墓。上怒謫居中都。又不及。仁宗復爵事。正統實錄亦云。欽永樂五年。坐事削爵。安置鳳陽府。此皆承

某家傳之誤而不察也。

二十一

實錄永樂五年九月乙卯。交趾總兵官張輔等遣都督  
僉事柳升。齎露布獻俘至京。上御奉天門受之。以黎  
季犛及子蒼。及其僞將相胡杜等。悉付獄。而赦其子孫  
澄芮等。命有司給衣食。宣德元年三月辛亥。行在工部  
營繕司主事黎澄考滿。吏部劾奏。澄歷九載。悉不赴部  
給由。今又歷兩考。始給由。有違定制。上曰。澄在安南  
罪重。皇祖特宥而用之。今所犯小罪。可宥也。二年十  
二月丁卯。陞行在工部營繕司郎中黎澄爲本部右侍

郎。食祿不視事。三年正月乙酉。命黎澄月奉全支米。澄前安南僞王黎蒼之兄。太宗赦而用之。正統元年九月丁酉。陞黎澄爲本部左侍郎。仍於內府供事。以九年考滿也。八年四月乙未。工部左侍郎黎澄年七十。應致仕。上疏乞畱用。上憐其交趾遠人。從之。十年六月甲寅。陞黎澄爲本部尚書。仍於內府供事。以九載秩滿也。十一年七月丙子。工部尚書黎澄卒。遣官致祭。命有司營葬。又交趾都指揮使張欽本傳。永樂四年。從黔國公沐晟征安南。嘗領哨騎千人。覘賊于奇羅海口。猝與賊遇。欽奮身提槊而前。與戰數合。賊敗走。部卒李保保追

禽僞衛國大王黎澄。及其三子。澄之初授主事。無可考。以諸書覈之。當在永樂九年十年間也。野記云。黎季犛降。其三子皆隨入朝。其孟曰澄。賜姓陳。爲工部尚書。澄善製槍。爲朝廷創造神槍。後貶某官。而命其子世襲錦衣指揮。澄願從文。乃許。令世以一人爲國子生。今凡祭兵器。并祭澄也。其仲曰騰。賜姓鄧。亦官尚書。後貶江陰縣佐。有三子。亦令一人襲錦衣指揮。并賜江陰田甚厚。永蠲其徭。今猶守世業。其季曰某。官爲指揮。久之乞歸祭墓。旣往。卽自立爲王。王氏二史攷云。季犛之次子曰澄。卽所謂僞相國越國大王者。季犛及蒼旣長繫。澄赦。



出監造內府器仗。累官工部尚書。子叔林亦累官工部侍郎。食尚書俸。不聞其賜姓與所謂鄧騰也。按國史明言黎澄爲季犛長子蒼之兄。而王氏云次子。且以衛國爲越國。亦謬。至于野記鄧騰及其季自立之說。尤爲無稽。江陰李詡漫筆載鄧尚書事狀略云。公諱明。字光遠。安南產也。三歲失怙恃。其姨君阮樞密撫之成人。長而力學。國王陳日焜知其才。以女妻之。元至正間。詔拜尚書省左叅知政事。迨國朝永樂元年。克其國正使。齎方物表箋入慶賀。上嘉其馳驅。賜宴於庭。陛辭。賜鈔錠綺衣。遣官護送還國。二年夏。逆臣黎季犛殺其主。公毅

然興義兵伐之。四年。首迎王師內附。率其子建平府鎮撫使鄧師諱并官僚軍民獻納東都路。英國張公輔受之。遂命統攝歸附人員。六年七月。勅公爲叅政。撫其民。授師誨九真知州。繼以招降郭專等功。調知福安。八年。陳季擴復嘯聚。朝廷屢詔招撫。兵部尚書黃公福遣公至軍。諭以禍福。言辭愷切。季擴倒戈效順。詔授季擴左布政使。凡招徠者。擢官增祿有差。時黃福以工部尚書掌交趾布政司事非兵部也。八年十二月。季擴上表請降。許之以爲交趾右布政使非左布政也上乃命戶部郎中王進指揮陶弘乘傳趣公至京。錫之筵宴。拜資善大夫行在工部尚書。賜第京師。仍給鈔錠白金衣榻。

器用。命扈駕北征。乃與同附大鴻臚陳公季暄。工部尚書黎公澄。創神機營。建盛甲廠。製神鎗神銃。退黠虜於九龍山下。未幾遘疾。以永樂十年五月一日卒於王事。享年六十有一。上悼念功勞。遣官諭祭。賜葬京師西山玉臺岡南安河邨之原。與陳黎二公丘隴相望。誠異數也。師誨以公舊勲。晉職燕山衛。尋以言事謫直隸常州府江陰縣主簿。卒於官。奏聞。贈光祿寺丞。遂葬江陰。由里山之東麓。未幾。廷議交趾推誠順化功臣子孫。宜頒恩命。勅下戶工二部給勘合。賜江陰縣善政橋南莊房一所。靖江東西二沙。孤山等處沙田十八頃有奇。俾

子孫居其地。仍世廕其後。一爲順天府儒學額外廩膳生員。一爲鴻臚寺司賓署序班。典其國通事。余攷之史。永樂四年。討黎季犛。歸附姓名。無所謂鄧明與子師誨者。惟九年十一月。張輔追陳季擴于緣海。聞石室福安等州縣草寇黎蒞范慷等。近交趾城爲患。遂往征之。黎蒞中流矢死。賊將范慷杜箇旦鄧明阮思瑊等遠遁者。相繼悉被禽。自是慈廉福安諸州縣皆帖然。然後知此鄧明者。嘗附季擴爲寇。以力屈就禽。而其地在福安州界。與事狀髣髴相近。其後朝廷或赦而官之。與黎澄例同。而事狀所云。先爲叅政。繼晉尚書。疑亦後人夸大之。

辭也。且鄧明卒于永樂十年。年六十有一。則當元至正間。不過十餘歲。國王安得遂以女妻之。而有叅知之命乎。明以九年至京。而成祖北征瓦剌。則十二年事。計明之死。亦已久矣。焉有扈駕退虜之事。蓋鄧之子孫。勦拾平定南交錄。及通紀諸書。而爲事狀。故其官爵功次。多有失實。至若姓名存沒。則約畧可據。亦足以證野記之誣矣。又按宣德三年八月。行在禮部尚書胡濙奏。交趾土官知州阮德舉。及州判縣丞訓導吏典等。以公差考滿丁憂。同妻子家人還交趾者。中途聞王師已還。而賊據城。皆不願歸。具告有司。遞送來京。願就京住。上。

命各與房屋。依品級支俸。無俸者月給食米一石。故官家人。月給食米五斗。七年七月。改交趾上洪州等衙門歸順土官知州等官。阮遷干等四十五員。爲山東山西青州等府州縣通判判官。照磨驛丞。蓋當時優恤嚮化之臣如此。鄧師誨之官主簿。與賜田宅。必亦用此二例也。而事狀云。以言事謫。後贈光祿。皆傳會不足信。

國史考異卷五終